

Da Fruajoarsputz

Die greane Staijamoak, di is recht grouß.

Do wochst vül Wold und a vül Gros.

Es is a Laund so herrlich schayn,

glei siebzehn Bezirk beinauder sain.

Mit saunfte Hügl, stali Berg und Hochgebiag,
zan Waundan, Radlfoan und fia scheyni Ausfliag:

Entlaung da Eynns, da Polten, da Liesing und da Mua,
vom Olmrausch bis zu di Sterzbam geat di Tua.

Iwa di Müaz, entlaung da Bochleif, Wiesen und Wölda;

Boa lous, iwa di Folsn wiast glei a bissl oulda!

Natur pur, a Laundschoftspark fost ohne Föhla.

Doch holt, des ReimydüL is triagirisch: do hots wos gröuwa!

Nun kumbts a vua wia gwise leit holt sou san,

dass ian Obfoll ochtlos wegwerfn tan!

Do hauns an Müll kreiz und quer anstott in di Kiwl

Iwa di stali Leitn, aufs Baunket, in Ocka und aufs Bleaml.

Iwa di Böschung owi und aufd Stroßn;

„Jo, day san deppat „, denkn si di Hosn!

Glei vom Auto aussı und in Stroßngrobm,

wia die Henn ihrn Dreick gor ohne Scham

Aussi pfeffat auf die wüldi Gstettn!

Folln losn in die feichti Lettn.

Aufm Parkplotz glaij net weit weg vom Mäcki

steh glosn die Sackl, Schochtln mit Servietti.

In da dunkln Nocht, ba dichtn Neyjbl, jedazeit,
Oult und Jung, Maunzbülda und Weiwaleit.
Schichtoawaita, Pendla und a Haufn Auslända;
Deij kean ausgfoascht und gstroft va di Kiwara!
Jo hobm di Leit souvül Göld zum Rouhstouff-Vaprassn,
Dass glei olls kinan weyjschmeissn und mit da Natur urassn?

„Littering“ hoast des modeane Woat.
Doch modean is des net: glaij weyjk vur Ort.
Des is goar mittelolterlich a blede Moude;
Bequem is as: Fensta auf und aussu - is des a Gaude?
Littring songs dazua im Fochschagaun
jo gibbs koa stairisches Wuat im Talon?

Doch nur gwise Leit schmeissn ian Dreck vom Auto ausse;
Gwissnlouse: Dosn, Floschn, Sackl und Schochtln von da Mc Jause.
Da Schochtlwiat vakaft des Glumbat eh schee teija -
Hirnlouse Foara entsoagn daun de Reste van da Faija.
Gedaunknlouse, Freizeitgsoulschoft , da Moslem und da Christ,
Autofoara, Radla, Waundara – kurz ols wos trinkt und isst!

Jo wea saumelt hiaz vom Grobm den gaunzn Mist?
Und putzt eam Putz und Stingl weyjk mit oana List?
Olle zaum mit guati Leit, Vernünftige und Lichtgstoltn!
Die wos übrig hobm fia di Natur und die Umwolt hoch holtn!
Jo, es san feschi Leit, maunchi sogour in Unifoam
Des valaung da Dienst, is schain und sche woam!

Di Beag- und Naturwocht hot des Kommando und talt ein.

Di Fuaßbolla, da Tennisclub, da Sing- und Spuatvarein,

di Schulkinda mit ihre Lehra gaim a Gas

und kriagn an Opfl ols Belohnung - des is klas!

Di Stroßnmeisterei putzt im Dienst ols tip und top

Und maunch ana juchazt: hopp, hopp, hopp!

Di Fischa und di Herrn mitn gschultatn Gweah,

Mit Begeistarung olte und junge freiwillige Feijawea,

Deyj saumlt, sichat, transpuatiat und eskoadiat.

Da Gmeidirot mitn Vize, dea digital ols fotografiat.

Di Obfollberota vom Vabaund soagn fia des Drumherum.

Mitn Müll treffn si daun olle im Oltstouffsaumlzentrum.

Olle san heit untawejjgs, um zan klaubm,

di Laundschoft vom Unrot zan befrein.

Da Biagamoasta, Pfora und vül Privati treyjffn si heit

Und des olls in ihra sougenauntn freien Zeit!

Und sou is die Gemaindi wiada amol

des Zentrum fia di Demokratie wia bei da Wohl.

Nimm den Sock den rousarotn und putz ols weyjck,

spül Torrero gegen Müll mit an Zwicka ohne Schreyck!

„Bugln tama net!“ sogt da Gmaidioawaita aum staln Haung

„Mia hom zan Klaum a hulzane Zaung an Meta laung!“

Da Mist lig jo am Boun, do miassat ma knean kreizhul

Des tatat da Baundscheim der olden Leit net wuhl.

Mitn Stairatrakta, Spiesa und di Sackl

wiad da Müll soatiat in rousaroute Packl.

Do oum ban doxbeag vor di drai Feichtn bai da Gobelung

do ligt sougoa von da Viagra di laare Vapockung !

Ma darots net, wea ebba des wuhl woar?

Ebba ban huamfoan? Na, ban fuatfoan eh kloar!

Loss net foln dei floschn Bia!

Wixas net aussie die dousn roter Stia!

Brings zruck die Vapockung fia des schnölli Grülte;

Da Schochtlwirt hot fia di Vaweatung a Bemühte.

Loss net foin dei laare Aludousn, sie koust vül Göld,

braucht zvu Energie, vaschantlt nua di Wöld.

Belost nur bled des Ökosüstem

Und bringt sozial so maunchs Problem.

Obfoll ziagt wia a Magnet sou sea.

Ligt amol a Futzl, wird's glai imma mea!

Wou vul liegt, do kumbt vul hin,

Is wia ban Göd bringat an Gewinn.

Wochst zua mit houchn Gros und softige Kreitl,

vamüllt die Geygend da Mc Beitl!

As Plastik varrott net amol in viahundat Joa,

des Glos is fia gwise Viecha a bsundre Gfoa!

Sou geht's net weida, des kauns net sain!

Wou blaib di Erziehung von de Oultanlein?

Jetzt stopp ma die Mentalität in dain schaynan Laund!

Die Obfolltrennung mocht die Aktziaun bekaunt.

Mit Besonnenheit, Bewusstseinsbuldung und Kurasch

Mia sauml'n ol dain weyckgschmissanen Gatsch.

Mia mochn an Pranga und stapln hoch den Müll,

Suln olle schwoazzn Schof ihre Sündn segn mit Gebrüll

Und obs nou gnschnibm hot und da Schnee lig metahouch.

Es geht uns ollen doch nur um die oani Soch:

A Ordnung, den Himml auf Erden und in de Herzn

Mit a bissl a Gaude und a boar lustige Scherzn

Des zoag ma auf: mit Trari Trara

Jo sou geht's a!

Zan Schluss a groußa Daunk ollen, dey mitgmocht hobm, und dem Organisationskommittee

Da Fochobtalungneinzehndeh!!!

Walter Riedl